



5. september 2023

UKA 2023/155

Inatsisartut Suleriaasianni § 36 naapertorlugu apeqquaqaat aallaavigalugu siunnersuut imaattoq matumuuna saqqummiuppara:

Sulisinnaagaluarlutik sulinngitsut pisortaniit pisartagaqassagunik sulinnginnerup nalaani inuiaqatigiinnut ikiuuttussatut pisussaaffilersinnaanerigut apeqquaqaat aallaavigalugu oqallisissiatut siunnersuut.

(Inatsisartuni ilaasortaq Aqqalu C. Jerimiassen, Atassut)

Nunatsinni immitsinnut pilersorsinnaanerulissagutta sullarinnerulertariaqarpugut. Allat pisuutiinnarnagit inuit ataasiakkaarluta immitsinnut napatissinnaanerulertariaqarpugut. Utaqqiinnarunnaassagutta pilersorneqarnissamillu naatsorsuuteqarunnaassagutta immitsinnut piumaffiginerulertariaqarpugut.

Ajoraluartumimmi ukiut 50-inngoriartuaalersuni saamerliusunik nunarput aqunneqartuarsimanerata takussutissartaraa pisortanik isumalluuteqarpallaalersimaneq utaqqiinnartunngorsimanerlu. Kingunerivaalu aaqqitassaartillugu terlinganiit nipituumik suaartaannartunngorsimaneq, allanik pisuutitsineq, kamassaqarneq, utaqqiinnaleqqaneq, iliuusissaaleqinerlu.

Immitsinnut nalligivallaaleqqavugut ajortumik pineqarsimaneq unittoorfigalugu qaqeqqinneq ajulertuusilluta. Angusaqarniaruttali immitsinnut piumaffiginerusariaqarpugut. Inuiaat allat kivittusaaqqatigut, naakkigineqarluta aqutissiuunneqartusaaqqatigut, uagut namminerpiaq suliaasaqarpugut annertuumik. Immitsinnut tatiginerulertariaqarpugut.

Nunatsinni sulinngitsut allattorsimaffianni sulisinnaagaluartut ajoraluartumik amerlavallaarput. Kalaallit angajoqqaatut meeqqagut annerusumik piumaffiginngitsoorsimaneratsigit allaat ullaakkut makissinnaaneq aporfusarluni. Akisussaaffik atuarfinnut, ilinniarfinnut, politikkerinut, nunasiaateqarsimasunullu igeriuttuarsinnarparput meeqqagut sernissorlugit.

Taamaattumik Inatsisartut isumarsi tusarusupparput sulisinnaagaluarlutik pisartagaqarlutik angerlarsimaannaleqqasut pisartagaqarniarunik inuiaqatigiinni sullisseqataasussatut pisussaaffilersinnaanerigut. Kommunit nakkutigisaannik utoqqarnik sullisseqataasussatut, ukiukkut nivattussatut, pinngortitami salisussatut, allanillu suliaasaasinnaasunik suliakkerneqarsinnaalersillugit.

Periarfissaasinnaagaluarportaaq inuusuttut ingerlariaqqinneq ajulersunut sakkutuunngornissamut periarfissaq ersarissaqqinneqarpasut. Sakkutuunngorniarnermimi imminut piumaffigisinnaanissaq annertuumik ilikkarneqartarmat. Siunissamilu nammineerluta sineriapput nakkutigilernissaanut piareersalereertariaqarpugut.



Ullunilu makkunani kangiamiut sullarissut kalaalliniit ajorineqartarnerat annertusiartorpoq. Ajoriinnarnagit nammineerluta sullarinnerulertariaqarpugut inangerniarneqartutut misigissanngikkutta. Akisussaaffik uatsinniippoq, inuiaat nammineerusuttut nammineerlutik iliuseqartariaqarput, imminnullu piumaffiginerusinnaasariaqarlutik. Neriniartarfinni, pisiniarfinnilu sulisuugaanni, namminersortuussagaanni, aalisartuugaanni, allaniluunniit pisortatut allatullu qaffasissumik atorfeqassagaanni.

Kalaaleqaterparujussuatsinnut sullarissunut mitalliineruvoq akileraartuarlutik ulapporissut akilersugaannik sulisinnaagaluarlutik sulinngitsut pisartagaqartinneqarmata. Pisartagaqassagaanni pisussaaffiliineq annertunerulertariaqarpoq.